



**UDRUŽENJE
POSLODAVACA**


BUSINESS

Info Newsletter

NOVEMBAR 2023 // BROJ 128

U ovom broju, između ostalog, čitajte:

- **UPFBiH pozdravlja odluku Vlade FBiH i apeluje da se ne povećava cijena električne energije za privredu**
- **UPFBiH i UPRS nastavljaju insistirati na pomjeranju roka za plaćanje PDV na zadnji dan u mjesecu**
- **UPFBiH Vladi FBiH: Hitno usvojite zakone koji će omogućiti povećanje plaće zaposlenima u realnom sektoru do 400 KM bez poreza i doprinosa**
- **Postignut finalni dogovor oko akcije "Zaključavamo cijene"**
- **Održana tri interaktivna treninga za kompanije i okrugli sto na temu primjene novog Zakona o zaštiti na radu**



UPFBiH poslodavcima: Ne potpisujte ponude koje je dostavila EPBiH dok se ne riješi pitanje cijene struje za privredu

"Intenzivno razgovaramo sa Upravom Elektroprivrede BiH i resornim ministrima u Vladi FBiH kako bismo razriješili pitanje cijene električne energije za privredu"

Udruženje poslodavaca u Federaciji Bosne i Hercegovine poziva članice i sva privredna društva u FBiH koja su od Elektroprivrede BiH dobila ponude za cijene električne energije sa povećanjem da ove ugovore do daljnjeg ne potpisuju.

"Intenzivno razgovaramo sa Upravom Elektroprivrede BiH i resornim ministrima u Vladi FBiH kako bismo razriješili pitanje cijene električne energije za privredu. U UPFBiH se kategorično protivimo povećanju cijena električne energije za privredu", kaže predsjednik UPFBiH Adnan Smailbegović.

Na inicijativu UPFBiH, tokom protekle i ove sedmice Smailbegović i direktor UPFBiH Mario Nenadić održali su sastanke sa generalnim direktorom Elektroprivrede BiH i njegovim saradnicima, zatim sa ministrom energetike, rudarstva i industrije Vedranom Lakićem i zamjenikom premijera i ministrom poduzetništva, razvoja i obrta u Vladi FBiH Vojinom Mijatovićem.

"Još uvijek nema zvaničnog stava nadležnih u Vladi FBiH i Elektroprivredi BiH u vezi sa cijenom električne energije za privredu. Tokom razgovora smo naglasili da je stav poslodavaca da nema nikakvog razloga, niti potrebe za povećanje cijena električne energije privredi te da poslodavci ne trebaju rješavati probleme EPBiH, izazvane drugim faktorima, nevezanim za realni sektor. Ono što za sada pouzdano znamo jeste da je dogovoreno da se u Vladi FBiH održi hitan sastanak kojemu će prisustvovati poslodavci, predstavnici EPBiH i Vlade FBiH na kojem bi se trebao postići konačan dogovor o ovom pitanju", kaže Smailbegović.

I ovim putem pozivamo vlasti i rukovodstvo EPBiH da rasterete poslovanje realnog sektora i omoguće veće investicije i razvoj u narednoj godini.

Sindikati iz realnog sektora: Povećanje cijena električne energije za privredu ugrožava status radnika u FBiH



Predstavnici sindikata iz realnog sektora upozoravaju da bi se najavljeni povećanje cijena električne energije za privredu moglo negativno odraziti na status radnika i radnica u Federaciji Bosne i Hercegovine.

Iz Samostalnog sindikata šumarstva, prerade drveta i papira Bosne i Hercegovine, Sindikata građevinarstva i industrije građevinskog materijala Bosne i Hercegovine, Sindikata hemije i nemetala FBiH, Sindikata tekstila, kože, obuće i gume FBiH te Sindikata metalaca FBiH naglašavaju da bi povećanje cijena električne energije za privredna društva nužno dovelo do povećanja cijena hrane, ali i svih drugih roba i usluga. Predstavnici industrijskih sindikata ističu da bi naknadno moglo doći i do povećanja cijena električne energije za domaćinstava, ako ne do kraja 2023. godine, onda se to može očekivati u narednoj godini.

Svjetska kriza izazvana ratovima u Ukrajini i na Bliskom istoku značajno utiče na većinu privrednih aktivnosti u Federaciji Bosne i Hercegovine. Značajno smanjenje broja ranih mjesta u industrijskom sektoru osjetno je već od sredine 2022. godine, upravo iz razloga što je većina industrijskog sektora izvozno orijentirana.

"Kriza je naročito osjetna u sektoru šumarstva i drvne industrije, ali i papira. Proizvodni

kapaciteti odavno su ograničeni, a broj radnika u nekim fabrikama za proizvodnju namještaja značajno je smanjen. Bojimo se da će iskazani finansijski gubitak u poslovanju Elektroprivrede BiH u periodu januar – septembar 2023. godine biti prebačen na teret privrede i građana, a prije svega radnika i radnica iz realnog sektora. Ponovo aktualiziranja najava poskupljenja električne energije u Federaciji BiH dodatno unosi nemir među radnike i radnice, ali generalno i građane", kaže predsjednica Samostalnog sindikata šumarstva, prerade drveta i papira Bosne i Hercegovine Lejla Ćatić.

S tim u vezi sindikati iz realnog sektora traže od Vlade Federacije BiH da donese mjere koje će onemogućiti povećanje cijena električne energije za privredu, odnosno, donese mjere kojima će se zaštititi privreda, radnici i radnice u industrijskim sektorima i građani u Federaciji BiH.



Industrijski sindikati traže od vlasti da više računa povedu o realnom sektoru i radnicima i radnicama realnog sektora, koji stvaraju nove vrijednosti i pune budžetske i vanbudžetske fondove.

Poučeni lošim iskustvima iz prošlosti, upozoravamo da se povećanje cijena električne energije za privredna društva uvijek negativno odrazi na radnike i radnice, na način da smanjenje privrednih aktivnosti dovodi do otkaza ugovora o radu, smanjenja plaća i ugrožavanja životnog standarda radnika i građana.

Sindikati ponovo ukazuju i na potrebu hitnog rasterećenja cijene rada, donošenjem seta zakona kojim će se omogućiti povećanje plaća radnika.

UPFBiH: Elektroprivreda BiH će od kompanija dobiti dodatnih između 25 i 28 miliona KM



Udruženje poslodavaca u Federaciji Bosne i Hercegovine naglašava da će u skladu sa odredbama novog Zakona o električnoj energiji u FBiH koji je usvojen u julu ove godine, mnoga privredna društva u FBiH preći sa javnog na tržišno snabdijevanje firmi, koje značajno povećava cijenu električne energije.

"Radi se o nekoliko hiljada kompanija, uglavnom malih porodičnih firmi i obrta kojima će prema odredbama novog Zakona o električnoj energiji FBiH značajno biti uvećana cijena električne energije. Naše analize govore da će samo po tom osnovu Elektroprivreda BiH u 2024. godini zaraditi dodatnih između 25 i 28 miliona KM. Upravo zbog toga još jednom apelujemo da ne postoji niti jedan opravdani razlog za dodatno povećanje cijene električne energije za privredna društva u FBiH u narednoj godini", kaže predsjednik UPFBiH Adnan Smailbegović.

Predstavnici UPFBiH u proteklih mjesec dana održali su niz sastanaka sa predstavnicima Vlade FBiH i Elektroprivrede BiH ukazujući na pogubne posljedice novog povećanja cijena električne energije za privredna društva.

"Još uvijek čekamo obećani zajednički sastanak sa predstavnicima Vlade FBiH i Elektroprivrede BiH u vezi sa cijenom električne energije za privredu. Naš stav je da privreda, a samim tim i građani ne smiju snositi posljedice lošeg upravljanja i problema koje ima EPBiH, koje su izazvali drugi faktori, a koji nemaju veze sa realnim sektorom", kaže Smailbegović.

Iz UPFBiH podsjećaju da svako povećanje cijena električne energije privrednim društvima u FBiH znači smanjenje konkurentnosti privrede, naročito izvozno orijentiranih kompanija, manje investicija u nove tehnologije, manje novih radnih mjesta, a čini upitnim i postojeća radna mjesta. Posljedice ovog povećanja će osjetiti ne samo privreda, nego i građani, jer više cijene električne energije rezultiraju povećanjem cijena roba i usluga na tržištu, životnih troškova građana i rastu inflacije.

"U situaciji kada aktuelna vlast još uvijek nije uradila ništa na smanjenju poreza i doprinosa na plaće, ukidanju parafiskalnih nameta, liberaliziranju tržišta radne snage, povećanje cijene električne energije predstavljat će novo opterećenje za bh. privredu, ali i građane", upozorava Smailbegović.

S ciljem zaštite kupaca proglašeno stanje ugrožene sigurnosti snabdijevanja električnom energijom za 2024. godinu

Vlada Federacije Bosne i Hercegovine je, na sjednici u Sarajevu održanoj 30. novembra, na prijedlog Federalnog ministarstva energije, rudarstva i industrije donijela Odluku kojom se proglašava stanje ugrožene sigurnosti snabdijevanja električnom energijom za 2024. godinu, usljed ekstremnog porasta cijena i nedovoljne ponude električne energije na tržištu.

Vlada Federacije BiH će, u stanju ugrožene sigurnosti snabdijevanja, propisati način i uslove za formiranje i kontrolu cijena snabdijevanja električnom energijom.

Ova odluka stupa na snagu danom donošenja, a objavit će se u Službenim novinama Federacije BiH i sredstvima javnog informisanja.

Kako je navedeno u obrazloženju, donošenjem današnje odluke stvara se pravni osnov da Vlada Federacije BiH postupi u skladu sa odredbama Zakona o električnoj energiji FBiH, odnosno u stanju ugrožene sigurnosti snabdijevanja, može uvesti posebne mjere kojima će propisati način i uslove za formiranje i kontrolu cijena snabdijevanja električnom energijom.

Naime, prema analizi JP Elektroprivreda BiH d.d. - Sarajevo, u skladu sa trenutnim tržišnim uslovima, prosječna cijena tržišnog snabdijevanja električnom energijom za 2024. godinu bi iznosila 141,53 eura/MWh, tj. prosječno povećanje bi bilo u iznosu od 87 posto. Bez primjene

bilo kakvog vida ograničavanja cijena snabdijevanja električnom energijom, preko 96 posto trenutnih kupaca električne energije na koje su se primjenjivane dosadašnje odluke o ograničavanju cijena, imalo bi povećanje cijene snabdijevanja električnom energijom preko 60 posto. S obzirom na to i današnja Odluka ima za cilj zaštititi kupce koji se električnom energijom snabdijevaju u okviru usluge tržišnog snabdijevanja od ekstremnog povećanja cijena. Vlada Federacije Bosne i Hercegovine je, na sjednici u Sarajevu održanoj 30. novembra, na prijedlog Federalnog ministarstva energije, rudarstva i industrije donijela Odluku kojom se proglašava stanje ugrožene sigurnosti snabdijevanja električnom energijom za 2024. godinu, usljed ekstremnog porasta cijena i nedovoljne ponude električne energije na tržištu.

UPFBiH pozdravlja odluku Vlade FBiH i apeluje da se ne povećava cijena električne energije za privredu

Udruženje poslodavaca u Federaciji Bosne i Hercegovine pozdravlja činjenicu da je Vlada Federacije BiH uvažila argumente UPFBiH da nema opravdanja za enormno povećanje cijena električne energije za 80 i više posto koje je tražila Elektroprivreda BiH u okviru ponuda dostavljenih privrednim društvima u FBiH.

Odluka Vlade FBiH kojom se u skladu sa novim Zakonom o električnoj energiji, proglašava stanje ugrožene sigurnosti snabdijevanja električnom energijom za 2024. godinu, uslijed ekstremnog porasta cijena i nedovoljne ponude električne energije na tržištu, a u okviru koje će Vlada FBiH, u stanju ugrožene sigurnosti snabdijevanja, propisati način i uslove za formiranje i kontrolu cijena snabdijevanja električnom energijom, u UPFBiH smatraju ispravnim načinom za zaustavljanje potpuno neosnovanih nakana EPBiH za enormno podizanje cijena električne energije, iako za to ne postoje opravdani razlozi.



"Očekujemo da nadležne institucije od kojih će Vlada FBiH pribaviti mišljenja u vezi sa cijenom

električne energije uvažuje naše argumente da bi svako dodatno povećanje cijene električne energije privrednim društvima rezultiralo poremećajima u proizvodnim procesima proizvođača, smanjilo konkurentnost domaće privrede i dodatno pogoršalo ionako nepovoljan poslovni ambijent u FBiH. Još jednom naglašavamo da bi povećanje cijena električne energije privredi u FBiH vodilo povećanju cijena roba i usluga, što bi se direktno odrazilo na kvalitet života građana", kaže predsjednik UPFBiH Adnan Smailbegović.

Podsjeća da će u skladu sa odredbama novog Zakona o električnoj energiji u FBiH koji je usvojen u julu ove godine, mnoga privredna društva u FBiH preći sa javnog na tržišno snabdijevanje firmi, koje već samo po sebi značajno povećava cijenu električne energije. Prema podacima UPFBiH radi se o nekoliko hiljada kompanija, uglavnom malih porodičnih firmi i obrta kojima će prema odredbama novog Zakona o električnoj energiji FBiH značajno biti uvećana cijena električne energije.

"Analize koje smo uradili govore da će samo po tom osnovu Elektroprivreda BiH u 2024. godini zaraditi dodatnih između 25 i 28 miliona KM. To je, također, oblast u kojoj se mora reagirati kroz izmjene i dopune Zakona o električnoj energiji FBiH, kako bismo male porodične firme i obrte, koji čine značajan procenat privrednih aktivnosti u FBiH sačuvali od propadanja", naglasio je Smailbegović.

Povećan prag za ulazak u sistem PDV-a

Dom naroda Parlamenta Bosne i Hercegovine usvojio je 23. novembra 2023. godine Zakon o izmjeni Zakona o porezu na dodatu vrijednost kojim se, zbog inflacije i povećanja cijena roba i usluga, povećava prag za ulazak u sistem PDV-a, sa postojećih 50.000 KM na 100.000 KM. Na ovaj način se dodatno rasterećuju preduzeća koja imaju male prihode.

UPFBiH napominje da je ovo jedna od inicijativa Udruženja poslodavaca u FBiH, pored niza drugih izmjena koje je iniciralo u ovom zakonu.

Zakon o izmjeni Zakona o porezu na dodatu vrijednost objavljen je u Službenom glasniku BiH, broj: 80/23, od 24.11.2023. godine i stupa na snagu osmog dana od dana objavljivanja u "Službenom glasniku BiH". Zakon možete preuzeti [OVDJE](#).

UPFBiH i UPRS nastavljaju insistirati na pomjeranju roka za plaćanje PDV na zadnji dan u mjesecu

Udruženje poslodavaca u Federaciji Bosne i Hercegovine i Unija poslodavaca Republike Srpske pozdravljaju odluku poslanika Predstavničkog i Doma naroda Parlamentarne skupštine Bosne i Hercegovine o usvajanju izmjena i dopuna Zakona o porezu na dodanu vrijednost Bosne i Hercegovine, kojim se prag za obaveznu registraciju u sistem PDV-a, sa postojećih 50.000 povećava na 100.000 KM.

„Na ovaj način se u značajnoj mjeri pojednostavljuje i olakšava poslovanje mikro i malih preduzeća u BiH. No, moramo izraziti razočarenje činjenicom da nije usvojena izmjena i dopuna Zakona o PDV-u BiH, koja predviđa plaćanje PDV-a posljednjeg dana u mjesecu, a ne desetog u mjesecu, kao što je sada slučaj. Opet ponavljamo da je postojeći rok prekratak za pojedine poreske obveznike, naročito ako u ovom periodu imaju dva vikenda i praznik, a ukoliko porezni obaveznik ne podnese prijavu u zakonski predviđenom roku plaća zatezne kamate“, navode iz UPFBiH i UPRS.

Iz UPFBiH podsjećaju da su u dokumentu „Šta poslodavci očekuju od vlasti“ koji je prošle godine, uoči izbora, poslan svim političkim strankama dostavljen prijedlog izmjena Zakona o PDV-u, a koje imaju za cilj olakšavanje poslovanja privrednim subjektima u BiH, jačanje konkurentnosti bh. privrede i usklađivanje poreske politike u oblasti indirektnih poreza sa zemljama regiona i zemljama članicama Europske unije.

Između ostalog, prijedlog poslodavaca je i da se izmjenama Zakona o PDV-u ukine pravo na odbitni PDV za fakturu koja nije plaćena.

Iz UPFBiH i UPRS naglašavaju da nastavljaju insistirati na doradi i poboljšanju Zakona o PDV-u.

„Nastavit ćemo insistirati na usvajanju naših prijedloga o pomjeranju roka za plaćanje PDV-a na zadnji dan u mjesecu i ukidanju prava (ili obaveze?) na odbitni PDV na fakture koje nisu plaćene. Očekujemo da se ove izmjene i dopune ponovo nađu pred poslanicima i delegatima Parlamentarne skupštine Bosne i Hercegovine u prvoj polovini naredne godine“, kažu iz UPFBiH i UPRS.

UPFBiH Vladi FBiH: Hitno usvojite zakone koji će omogućiti povećanje plaće zaposlenima u realnom sektoru do 400 KM bez poreza i doprinosa



Kako postoje male ili nikakve šanse da do kraja godine budu usvojeni fiskalni zakoni kojima bi se smanjili porezi i doprinosi na plate, Udruženje poslodavaca u Federaciji Bosne i Hercegovine ponovo poziva Vladu Federacije Bosne i Hercegovine da donese i u hitnu parlamentarnu proceduru uputi neophodne izmjene i dopune zakona koje bi omogućile povećanja plaća zaposlenima u realnom sektoru u FBiH u iznosu do 400 KM, bez plaćanja poreza i doprinosa na ovaj iznos.

„Od maja čekamo da vidimo prijedloge novih zakona Vlade FBiH o doprinosima i dohotku. Osim tvrdnji da će novi doprinosi na plaće iznositi 28 posto, zvanično nikada nismo dobili nijedan dokument koji se odnosi na ovu materiju. U idealnim uvjetima, kada bi odmah donijeli ove zakone i usvojili ih do Nove godine, njihova primjena bi počela tek u julu naredne godine. Zbog toga mislimo da Vlada FBiH treba hitno predložiti, a Parlament FBiH usvojiti, izmjene i dopune zakona kojima bi se omogućilo povećanje plate do 400 KM, s tim da se ovaj iznos povećanja plate ne oporezuje“, kaže Adnan Smailbegović, predsjednik Udruženja poslodavaca u FBiH.

Predsjednik UPFBiH naglašava da se radi o izmjenama i dopunama zakonskih rješenja koja bi bila privremenog karaktera, odnosno, važila bi do donošenja novih zakona o doprinosima i dohotku FBiH.

UPFBiH je još krajem prošle godine pokrenulo aktivnosti i preko ovlaštenih predlagača zakona, u hitnu parlamentarnu proceduru uputilo inicijativu za izmjene i dopune Zakona o doprinosima FBiH i Zakona o porezu na dohodak FBiH. Konačan cilj izmjena i dopuna ovih zakona bio je povećanje svih plata zaposlenih u realnom sektoru koje bi iznosilo do 400 KM. Ove prijedloge Vlada FBiH je odbila i obećala donošenje fiskalnih zakona kojima će opterećenje plata biti značajno smanjeno.

Kako do toga nije došlo, UPFBiH predlaže, hitno usvajanje izmjena i dopuna zakona koje bi omogućilo povećanje plate uposlenika za neoporezivih do 400 KM. To bi omogućilo da ukupno povećanje plate ide direktno radnicima, čime bi se, barem djelomično poboljšao njihov status.

Iz Udruženja poslodavaca u Federaciji Bosne i Hercegovine još jednom naglašavaju hitnost donošenja ovih izmjena i dopuna, kako bi se zaposlenima u realnom sektoru pomoglo da lakše podnesu povećane troškove života, a istovremeno barem dijelom zaustavio odlazak kvalifikovane radne snage iz BiH.

„Nažalost, ostvarila su se naša predviđanja da ćemo izgubiti 2023. godinu kada je u pitanju donošenje reformskih zakona, koji bi omogućili smanjenje poreza i doprinosa i povećanje plata zaposlenima u realnom sektoru. Kako ne bismo izgubili i 2024. godinu, insistiramo na hitnom donošenju zakonskih rješenja koja će omogućiti povećanje plata do 400 KM

zaposlenima u realnom sektoru. Za ovaj iznos povećanja se ne bi plaćali porezi i doprinosi, a primjena bi počela od 1.1.2024. godine", kaže Smalbegović.



Održana sjednica UO Udruženja poslodavaca u FBiH

Upravni odbor Udruženja poslodavaca u FBiH održao je VIII online sjednicu 23. novembra 2023. godine na kojoj se raspravljalo o problemima vezano za nesaradnju predstavnika Vlade Federacije, a u vezi sa prioritetima i drugim pitanjima od interesa za poslovnu zajednicu u FBiH (set fiskalnih zakona, cijene električne energije i druga pitanja i prioriteti). Vezano za pitanja cijene električne energije Upravni odbor je dao podršku UPFBiH svim do sada provedenim aktivnostima. Također Upravni odbor je zaključio da će, do donošenja Odluke od strane Vlade FBiH u vezi sa ograničavanjem povećanja cijene električne energije, Udruženje poslodavaca u FBiH pojačati medijsku kampanju i pritisak kroz medije.

UO UPFBiH je također donio Odluku da će UPFBiH ponovno pokrenuti inicijativu za donošenje Zakona o dopuni Zakona o porezu na dohodak, a koja se odnosi na povećanje plaće do 400,00 KM. Naime, Udruženja poslodavaca u Federaciji Bosne i Hercegovine je pozvalo Vladu FBiH da donese i u hitnu parlamentarnu proceduru uputi neophodne izmjene i dopune Zakona o porezu na dohodak koje bi omogućile povećanja plaća zaposlenima u realnom sektoru u FBiH u iznosu do 400 KM, neoporezivi dio. Za ovaj iznos povećanja se ne bi plaćali porezi i doprinosi, a primjena bi počela od 1.1.2024. godine.

Vlada FBiH je obećala, obzirom da nije ispunila svoje obećanje donošenja seta fiskalnih zakona (Zakon o porezu na dohodak i Zakon o porezu na dobit), da će ponovno na dnevni red staviti dopunu Zakona o porezu na dohodak kao prelazno rješenje do donošenja novih zakona.

Intencija ovog prijedloga je da se omogući povećanje plaća radnicima, ali ne na teret poslodavca, jer to veći dio poslodavaca, u trenutnim uslovima poslovanja, ne bi mogao podnijeti.

Na ovaj način će se ublažiti negativne posljedice, unaprijediti okruženje za poslovanje u Federaciji BiH i poboljšati položaj radnika i standard građana. Ovom mjerom bi se doprinijelo zadržavanju radnika u BiH, ali i smanjenju sive ekonomije.

Upravni odbor je ispred UPFBiH imenovao Kristinu Ćosić i Almedina Kadrića za članove Radne grupe za izradu prijedloga teksta Prednacrta Zakona o zaštiti potrošača FBiH.

Postignut finalni dogovor oko akcije "Zaključavamo cijene"



U prostorijama ASA Group, a na inicijativu Udruženja poslodavaca FBiH održan je sastanak federalnog ministra trgovine Amira Hasičevića, predstavnika proizvođača, distributera, trgovaca zainteresiranih za učešće u akciji "zaključavamo cijene".

Federalni ministar trgovine Amir Hasičević kazao je da je ovo bila prilika da se detaljno predstavi dobrovoljna akcija smanjenja i fiksiranja cijena određenih prehrambenih proizvoda i ostalim akterima u distributivnom lancu od proizvođača, distributera, veletrgovaca, trgovaca do potrošača, od čega će korist imati potrošači kao krajnji korisnici.

"Namjera nam je bila da vidimo na koji način možemo jedni drugima pomoći u ostvarivanju zajedničkih ciljeva, a to je da kroz dijalog u partnerskom duhu, olakšamo našim potrošačima ovaj period divljanja cijena i pokažemo da smo društveno odgovorni uz posebnu osjetljivost spram najosjetljivijih kategorija. Akciju „Zaključavamo cijene" prevashodno smo kreirali i izdefinirali sa predstavnicima velikih trgovačkih lanaca. Htio sam da vidim sa proizvođačima kako možemo pomoći i ovim manjim trgovcima koji bi željeli da otvorimo dijalog, da vidimo kakve su mogućnosti da i njih uključimo, ukoliko iskažu interes", kazao je ministar Hasičević.

Predsjednik Udruženja poslodavaca u Federaciji Bosne i Hercegovine Adnan Smailbegović kazao je kako su poslodavci, članice UPFBiH, ali i ostali, kao društveno odgovorni i cijeneći

partnerski dijalog sa ministrom Hasičevićem, ušli u ovu dobrovoljnu akciju jednoglasno.

Pomoćnica ministra trgovine Merima Maslo kazala je kako je važno da ova akcija bude u normativnom okviru te predstavila zainteresiranima da je Ministarstvo sačinilo Protokol čijim potpisivanjem će zainteresirani i zvanično postati dijelom akcije snižavanja i zaključavanja cijena. Također je podsjetila da će akcija biti transparentna od početka do kraja i da će na web stranici Ministarstva biti objavljen spisak svih trgovaca i proizvođača koji učestvuju u akciji „Zaključavamo cijene“.



Nihad Imširović iz UPFBiH podsjetio je još jednom da je saradnja trgovaca, poslodavaca i Ministarstva strateški zaokret, jer prvi put u posljednje tri decenije imaju komunikaciju sa resornim ministarstvom i partnerski odnos u kreiranju što boljeg poslovnog okruženja, naročito kada je trgovina u pitanju.

"Izašli smo iz rigidnih odluka (Odluka o ograničavanju marži) i ušli u dobrovoljni projekat. Širi je obuhvat artikala u odnosu na prvobitno najavljeni. Izlazimo sa projektom koji obuhvata kompletan lanac od početka do kraja", kazao je Imširović.

On je dodao da u akciji „Zaključavamo cijene" nisu išli na to da uključe najjeftinije proizvode lošije kvalitete nego da obuhvate što veći broj dobavljača, da fiksiraju cijenu za kvalitetnu robu u određenom vremenskom periodu, u trajanju od tri mjeseca.

Veliki lanci se obavezuju da će sniziti i zaključati cijene za 40 + proizvoda, a mali mogu i za 20 + proizvoda. Kompanije koje budu učestvovala na vratima će imati plakate sa spiskom proizvoda i cijenama prije i poslije zaključavanja. Istaknuto je da se dijalogom, a ne nametnutim mjerama grade dobre priče. Ovo je dobar primjer kako u buduće treba raditi, ocijenili su sudionici sastanka. Cilj ove akcije nije samo zaključati cijene nego i da pokaže da poslovna zajednica treba biti uključena u svim procesima što se tiče ekonomije.

Udruženje poslodavaca u FBiH i resorno ministarstvo trgovine, najavljuju i nove projekte i saradnju na planu prilagodbe propisa s ciljem razvoja sektora trgovine i zaštite potrošača u FBiH.

Održan okrugli sto na temu primjene novog Zakona o zaštiti na radu



Zakon o zaštiti na radu Federacije BiH potrebno je unaprijediti i što prije donijeti oko 30 podzakonskih akata koji će pomoći u njegovoj efikasnoj provedbi u kompanijama, istaknuto je na pkruglom stolu o temu "Primjena novog Zakona o zaštiti na radu - ključni nalazi analize upravljanja zaštitom na radu u kompanijama u FBiH i prijedlozi za unapređenje", kojeg je 23. novembra 2023. organiziralo Udruženje poslodavaca u FBiH. Okrugli stol je organiziran u okviru projekta „Usostava Help deska za upravljanje zaštitom na radu“, kojeg provodi UPFBiH uz podršku Europske unije i Međunarodne organizacije rada.

"Oblast zaštite na radu je od izuzetnog interesa kako radnicima, tako i poslodavcima, a u konačnici i društvu u cjelini. Kroz prethodne aktivnosti u okviru projekta kojeg provodimo smo utvrdili dobre, ali i nedovoljno dobre strane Zakona o zaštiti na radu FBiH, tako da prostor za njegovo unapređenje postoji. Ono što bih istaknuo kao najveću primjedbu poslodavaca jeste da su određeni procesi zaštite na radu preskupi. Ne želimo zaštitu na radu doživjeti kao još jedno fiskalno ili parafiskalno opterećenje, novac koji moramo usmjeriti na procese želimo usmjeriti na radnike". Također, Udruženje poslodavaca u FBiH će u skladu sa zaključcima i projektnim ciljevima pripremiti konkretne primjedbe za izmjene i dopune zakonskih i podzakonskih akata u cilju poboljšanja ove oblasti kazao je direktor UPFBiH Mario Nenadić.

Pomoćnik federalnog ministra rada i socijalne politike za oblast rada, zaštite na radu i zapošljavanje Ernis Imamović istaknuo je da je novi Zakon o radu FBiH u potpunosti prilagođen

europskim standardima.



"Do sada smo donijeli devet podzakonskih akata, a potrebno ih je donijeti još 30. Ono što možemo reći jeste da je došlo do drastičnog pada povreda na radu i smrtnih slučajeva. Tako smo u ovoj godini imali šest smrtnih slučajeva, a prošle godine tri puta više. Mora se urediti zaštita na radu kod poslodavaca. Najčešći uzrok povreda na radu je nepridržavanje mjera zaštita na radu od strane radnika", rekao je Imamović.

Projekt koordinator Međunarodne organizacije rada Dženan Trbić je obraćajući se prisutnima iskazao zadovoljstvo saradnjom i rezultatima ostvarenim u okviru projekta „Uspostava Help deska za upravljanje zaštitom na radu“.

U okviru projekta provedena je anketa i intervjui sa poslodavcima u FBiH, a rezultate ankete i intervjua predstavio je Haris Deović, stručnjak za zaštitu na radu.

„Anketa je pokazala da je 48 posto kompanija spremno primjenjivati mjere zaštite na radu, 28 posto je već ispunilo te obaveze, dok je 24 posto anketiranih reklo da ispunjavanje obaveza zavisi od cijene. U prerađivačkoj industriji je 70 posto poslodavaca spremno primjenjivati mjere zaštite na radu, a isti procenat je već uradio dokument procjene rizika. Istraživanje je pokazalo da je 93 posto kompanija spremno provoditi mjere zaštite na radu na osnovu Procjene rizika. Za većinu kompanija cijena za izradu akta procjene rizika je velika i neprihvatljiva, a kompanijama veliki problem predstavlja različito tumačenje zakona“, kazao je Deović.

Na osnovu provedene analize i intervjua, šest treninga za preko 100 kompanija iz različitih

sektora , kao i primjedbi dostavljenih putem uspostavljenog Help deska, UPFBiH je identificiralo probleme sa kojima se susreću poslodavci u provedbi novog Zakona o zaštiti na radu.

„Najviše poslodavaca se žalilo na visoke cijene usluga za izradu akta za procjenu rizika, zatim na metodologiju za izradu akta o procjeni rizika. Smatramo da bi trebala biti primijenjena metodologija koja se primjenjuje u zemljama EU i regiona. Iako je trebalo biti formirano šest mjeseci nakon početka primjene, Vijeće za zaštitu na radu još nije formirano i smatramo da to treba uraditi hitno. Za poslodavce je neprihvatljivo da kompanije koje imaju jedno radno mjesto sa povećanim rizikom moraju imati zaposlenog radnika za zaštitu na radu", pobrojala je Mersiha Jusić, sekretar UPFBiH primjedbe na novi Zakon o zaštiti na radu FBiH.



Emir Hamidović, menadžer za zdravlje i sigurnost na radu u kompaniji Natron Hayat naglasio je da mora postojati opredjeljenje poslodavca za provedbu mjera zaštite na radu na poslu, ali se mora raditi i na promjeni svijesti uposlenika. Kao rezultat takvog pristupa u ovoj kompaniji je značajno smanjen broj povreda na radu.

Više informacija o projektu može se naći na linku: <https://helpdesk.upfbih.ba/>

Projekat "Uspostava help deska za upravljanje zaštitom na radu" se provodi u sklopu projekta "EU4Business Recovery" koji finansiraju Evropska unija i Savezna Republika Njemačka, a provode ga GIZ, MOR i UNDP. EU4BusinessRecovery podržava Bosnu i Hercegovinu u ublažavanju negativnih ekonomskih efekata uzrokovanih pandemijom COVID-19. Za više informacija posjetite www.eu4business.ba.

UPFBiH organizovalo interaktivni trening za kompanije iz hemijske industrije o provedbi mjera zaštite na radu



Interaktivni treninzi o provedbi mjera zaštite na radu u skladu sa odredbama novog Zakona o zaštiti na radu u FBiH za kompanije koje organizira Udruženje poslodavaca u Federaciji Bosne i Hercegovine su izuzetno korisni i pružaju učesnicima mnoštvo korisnih informacija i znanja koje mogu primijeniti u svakodnevnoj praksi provedbe mjera zaštite na radu, jednoglasan je zaključak učesnika treninga.

UPFBiH je organiziralo još jedan interaktivni trening za kompanije iz sektora hemijske industrije u Federaciji Bosne i Hercegovine kojem je prisustvovao veliki broj predstavnika kompanija. Interaktivni trening je održan u okviru realizacije projekta "Uspostava help desk za upravljanje zaštitom na radu" kojeg realizira Udruženje poslodavaca u FBiH uz podršku Europske unije i Međunarodne organizacije rada.

Pored članica UPFBiH interaktivnom treningu su prisustvovala i kompanije koje nisu članice Udruženja, a veliki interes predstavnika kompanija potvrđuje potrebu i nužnost održavanja ovakvih edukativnih treninga, a sve sa ciljem da kompanije u FBiH u skladu sa Zakonom provedu sve potrebne mjere zaštite na radu svojih uposlenika.

"Nosim jako pozitivne utiske o ovom treningu. UPFBiH je uradilo sjajan posao, počev od izbora predavača, preko dobijenih informacija i novih saznanja o provedbi mjera zaštite na radu.

Tokom treninga, kroz razgovore sa predavačima i kolegama iz drugih kompanija shvatio sam da svi imamo dosta nedoumica, a ovdje zajednički dolazimo do rješenja. Sve to pokazuje da je ovaj interaktivni trening pun pogodak. Zahvaljujući ovom treningu dobio sam adekvatne informacije i upute kako riješiti nekoliko problema sa kojima sam se sam susretao u provođenju mjera zaštite na radu u našoj kompaniji. Mislim da ovakvi interaktivni treninzi mogu pomoći da svi zajedno podignemo stepen zaštite na radu na viši nivo", kaže stručni saradnik zaštite na radu i zaštite od požara u kompaniji Konzum Fahrudin Čongo.

Cilj provođenja edukacije je pomoći kompanijama da na adekvatan način i u skladu sa Zakonom o zaštiti na radu FBiH provedu mjere zaštite na radu, ali i definiranje glavnih izazova i potreba koje proizlaze iz provedbe ovog i podzakonskih akata.

Amar Hrnjić je stariji inženjer zaštite od požara i zaštite na radu u kompaniji Global Ispat Koksna Industrija d.o.o. Lukavac – GIKIL.

"Tokom interaktivnog treninga podijelili smo iskustva sa kolegama iz drugih kompanija, a zajedno i predavačima i na osnovu iskustava drugih kolega uspjeli smo razriješiti neke od nedoumica koja kojima se susrećemo, neke stvari bolje razumijemo, a imamo i prijedloge kako unaprijediti zaštitu na radu. Kao i svaki novi propis i Zakon o zaštiti na radu u FBiH je donio neke nedoumice, vjerujem da će se vremenom te nedoumice otkloniti, mnoge stvari na osnovu iskustava provebe unaprijediti, jer svima nam je u interesu viši stepen sigurnosti radnika. Ovaj interaktivni trening će konkretno u našoj kompaniji pomoći da unaprijedimo mjere zaštite na radu, koje već primjenjujemo i o kojima posvećujemo puno pažnje", kaže Hrnjić.

Naredni trening održat će se 9.11.2023. godine za predstavnike kompanija iz građevinske industrije. Zbog velikog interesa kompanija bit će organiziran i trening za kompanije iz sektora tekstilne industrije koji će se održati 14.11.2023. godine.

U okviru projekta "Uspostava help deska za upravljanje zaštitom na radu" razvijen je ovaj sveobuhvatni trening koji se integrira u Help desk. Više informacija o treninzima o zaštiti na radu za sektore uredskog poslovanja i špedicije, metalskog i drvnog sektora može se naći na linku: <https://helpdesk.upfbih.ba/>. Projekat "Uspostava help deska za upravljanje zaštitom na radu" se provodi u sklopu projekta "EU4Business Recovery" koji finansiraju Evropska unija i Savezna Republika Njemačka, a provode ga GIZ, MOR i UNDP. EU4BusinessRecovery podržava Bosnu i Hercegovinu u ublažavanju negativnih ekonomskih efekata uzrokovanih pandemijom COVID-19. Za više informacija posjetite www.eu4business.ba.

Trening za kompanije iz građevinskog sektora o zaštiti na radu

Trening o provedbi mjera zaštite na radu u skladu sa odredbama novog Zakona o zaštiti na radu u FBiH za kompanije iz građevinskog sektora pobudio je veliko interesovanje predstavnika firmi iz ovog



sektora, koji, zbog uvjeta rada, mora posvetiti naročitu pažnju provedbi ovih mjera. Trening je održan u okviru realizacije projekta "Uspostava help desk za upravljanje zaštitom na radu", kojeg realizira Udruženje poslodavaca u FBiH uz podršku Europske unije i Međunarodne organizacije rada.

"Ovakvi treninzi su jako korisni u našem poslu, jer uvijek možete nešto novo naučiti. Zajedno smo zaključili da svi trebamo raditi na promjeni svijesti kod svih o važnosti zaštite na radu", kaže Rusmir Jahić, inženjer zaštite na radu koji provodi mjere zaštite na radu u kompaniji Hering iz Širokog Brijega, kako u BiH, tako i u zemljama Europske unije.

Milenko Zadro je inženjer zaštite na radu sa 15 godina iskustva u građevinskom sektoru, od maja ove godine je sudski vještak za oblast zaštite na radu, a trenutno obavlja dužnost nadzornog inženjera zaštite na radu na poddionici autoputa Medakovo-Ozimice na Koridoru Vc.

"Građevinski sektor je grana industrije sa najfrekventnijim stupnjem nesreća na radu. Nesreće na radu se mogu prevenirati donošenjem i pridržavanjem cijelog niza dokumenata. Kada se započinje gradilište mora se uraditi elaborat o uređenju gradilišta koji propisuje sve mjere zaštite na radu koje se trebaju provesti. Zatim tu je uredba o uređenju gradilišta, a koja se odnosi i na sigurnost na radu. A posebno bih istaknuo dokument koji se prethodno mora osigurati, a to je procjena rizika radnih mjesta. Ovaj interaktivni trening nam svima koristi, prije svega mlađim kolegama, jer im kroz razgovore prenosimo naša znanja i iskustva, a svi zajedno ažuriramo naša znanja o provođenju mjera zaštite na radu sukladno najnovijim zakonskim rješenjima", naglašava Zadro.

Trening za kompanije iz tekstilne industrije o zaštiti na radu



U Udruženju poslodavaca u Federaciji Bosne i Hercegovine proveden je trening o provedbi mjera zaštite na radu u skladu sa odredbama novog Zakona o zaštiti na radu u FBiH za kompanije iz tekstilne industrije. Značajan broj predstavnika kompanija iz tekstilne industrije prisustvovao je interaktivnom treningu. Trening je održan u okviru realizacije projekta "Uspostava help deska za upravljanje zaštitom na radu", kojeg realizira Udruženje poslodavaca u FBiH uz podršku Europske unije i Međunarodne organizacije rada.

Kroz interaktivni trening se pokazala velika potreba i nužnost održavanja ovakvih edukativnih treninga, a sve sa ciljem da kompanije u FBiH u skladu sa Zakonom provedu sve potrebne mjere zaštite na radu svojih uposlenika.

"U oblasti tekstilne industrije mora se pokloniti puno pažnje zaštiti na radu, jer imamo visoki rizik, recimo, od požara. Imamo koncentraciju velikog broja ljudi na relativno malom prostoru i u slučaju da dođe do neke havarije može doći do stradanja velikog broja ljudi. To je samo jedan od razloga zbog kojih se u tekstilnoj industriji moraju poduzeti sve mjere zaštite na radu i smanjenja rizika u cilju prevencije. Sa donošenjem novog Zakona o zaštiti na radu u FBiH više pažnje se poklanja provođenju mjera zaštite na radu. A treninzi poput današnjeg nam pomažu da riješimo dileme sa kojima se susrećemo u provedbi mjera zaštite na radu u skladu Zakonom. Svi se mi susrećemo sa nedoumicama i vjerujemo da će rezultat ovih treninga biti prijedlozi kako da unaprijedimo Zakon i na taj način unaprijedimo cjelokupan sistem zaštite na


radu”, kaže Munir Pašalić, inženjer zaštite na radu u kompaniji Prevent Sewing iz Visokog.

Dženan Hadrović je inženjer zaštite na radu u tekstilnoj kompaniji AlmaRas iz Olova i ističe da se, naročito, u posljednje vrijeme puno više pažnje poklanja zaštiti na radu nego ranije.

„Nakon donošenja novog Zakona o zaštiti na radu u FBiH više pažnje se poklanja provođenju mjera zaštite na radu, više se potencira važnost zaštite na radu. A kvalitetno provedene mjere zaštite na radu u smislu sigurnog radnog mjesta, sa jedne strane, povećavaju zadovoljstvo uposlenika, a sa druge i poslodavcima garantiraju siguran poslovni proces. Edukacije poput ovog interaktivnog treninga, meni i mojim kolegama su pomogli da riješimo dileme, otklonimo nedoumice i nejasnoće u smislu kvalitetne provedbe zakonskih odredbi”, ističe Hadrović.

Projekat "Uspostava help deska za upravljanje zaštitom na radu" se provodi u sklopu projekta "EU4Business Recovery" koji finansiraju Europska unija i Savezna Republika Njemačka, a provode ga GIZ, MOR i UNDP. EU4BusinessRecovery podržava Bosnu i Hercegovinu u ublažavanju negativnih ekonomskih efekata uzrokovanih pandemijom COVID-19. Za više informacija posjetite www.eu4business.ba.

Održana sjednica Upravnog odbora Udruženja poslodavaca Kantona Sarajevo



Na sjednici Upravnog odbora Udruženja poslodavaca KS održanoj 10. novembra 2023. godine

članovi su najprije raspravljali o pripremi za narednu sjednicu Ekonomsko-socijalnog vijeća za područje KS, a koja će se održati 13.11.2023. godine. Na sjednici ESV-a KS raspravljat će se o Nacrtu zakona o robnim rezervama, Nacrtu zakona o zakupu poslovnog prostora te Programu rada Uprave za inspekcijske poslove KS za 2024. godinu. Članovi UPKS će pripremiti materijale te na sjednici ESV-a iznijeti svoje prijedloge, primjedbe, komentare na pomenute akte.

Na sjednici UO također se raspravljalo i o Planu upisa učenika za 2023./2024. godinu, te će poslodavci izanalizirati Plan po djelatnostima i dostaviti mišljenje i sugestije na Plan do 10. decembra kada je i traženi rok za dostavljanje. Također će se zatražiti sastanak sa ministricom za odgoj i obrazovanje KS Naidom Hotom-Muminović i organizovati okrugli sto kao i tematska sjednica na ovu temu.

Članovi članovi Radne grupe ispred UPKS za pripremu i izradu izmjena i dopuna Zakona o komunalnoj čistoći informisali su članove o aktivnostima Radne grupe i statusu pripreme pomenutih izmjena i dopuna. Naglašeno je da poslodavci insistiraju da se odvoz komunalnog otpada plaća po količini, a ne metru te da su protiv poskupljenja cijena odvoza otpada.

Pod tačkom Razno, predsjednik UO UPKS Suhad Ećo obavijestio je članove da je Ministarstvo za nauku, visoko obrazovanje i mlade uputilo Udruženju poslodavaca KS dopis u kojem se traži imenovanje dva člana u Savjet Ministarstva za visoko obrazovanje KS. Članovi su imenovali Suhada Eću i Muhameda Pilava u Savjet.

Održana sjednica ESV-a za područje ZDK: Osigurati kontinuirani dijalog socijalnih partnera



U sjedištu Vlade ZDK, 29. novembra 2023. godine održana je 36. sjednica Ekonomsko-socijalnog vijeća za područje ZDK, na kojoj je konstituisano

novo članstvo imenovano rješenjem Vlade ZDK iz reda ministara u novom sazivu Vlade ZDK, a za predsjednika Vijeća izabran je premijer ZDK Nezir Pivić.

Socijalni partneri su u nastavku sjednice primili k znanju Prijedlog budžeta ZDK za 2024. godinu i Prijedlog zakona o izvršavanju budžeta ZDK za 2024. godinu, te zaključili da u narednom periodu Vijeće treba intenzivirati rad, sve s ciljem osiguranja kontinuiranog tripartitnog socijalnog dijaloga između partnerskih strana, članica Ekonomsko-socijalnog vijeća za područje ZDK.

Dirktor UPFBiH učestvovao na panel diskusiji u sklopu otvaranja 9. Sajma bh. privrede



Na otvorenju 9. Sajma bh. privrede u Skenderiji upriličena je i panel diskusija o pitanju poboljšanja uslova i prava radnika za realni i javni sektor. Ispred Udruženja poslodavaca FBiH učešće je uzeo direktor Mario Nenadić koji je u svom izlaganju iznio prijedloge poslodavaca Federacije BiH, a Samir Kurtović predsjednik sindikata je predstavio ulogu i značaj sindikata kao i zaštitu prava radnika.



UDRUŽENJE POSLODAVACA

UDRUŽENJE POSLODAVACA FBiH
MARŠALA TITA 6, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba